

LA CARTA A LOS HEBREOS

Jesucristo m̃i ño Dios cheẽ mbuchecua nguiã

¹ Dios que ucheẽ mbiasa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiasa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo m̃i ño Dios cheẽ mbuchecua checua nguiã nande je co cote. Dios nguiĩte mbucheẽ nande je cote. Ae m̃i ndese chõ ngue Dios ibi ao nyii ra. Dios que em̃i mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacuã nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriirĩ tuchi” i chõ Dios nguiã ee. ⁵ ã ngue Dios ñee ãte ángeles mo je ra:
Seriirĩ ño nde re.
Ndereco que amee ndeje ra,
i ãte que Dios ángeles mo je ra.
Nderu chõ se re.
Seriirĩ ño nde re,
i ãte que Dios ángeles mo je ra. ⁶ Dios nguiirĩ mbu mose íbii que ñee nda:
Sã ángeles riqui adorar i ja seriirĩ je,
i que ra. ⁷ ã ngue Dios ñee ángeles rĩ nda:

Quiririã tu asi rã tuchi chõ ángeles re.

Serimba chõ ángeles re.

Tata rendi rã tuchi,

i que Dios ñee ángeles rĩnda. ⁸ Nguiĩ je quiatu que ñee ãnda:

Nde rei Dios. Ererecuarã mbei ra nde.

Ererecua turã tuchi ereico nde co.

⁹ Mbae turã eresaã sete quia co.

Mbae icuã nguia erechousei chiãte nguiã.

Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Ndeo je que ibei erechao no nda.

¹¹ Ñquĩnda ua ja chee.

Nde quia ra ereico bei.

Tiru ima na ja chee ra ñquĩ.

¹² Sã mbia riqui tiru ima mombo no.

Eyasu rerequia erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ñgue Dios ñee ãte ángeles mo je ra:

Ecoi sejii. Nde abe ra ererecua serese.

Ae ndeucuãyãte quia nae, ñquĩ je ra ndequirãcuã ateacuquia tuchi.

Ndequirãcuã tuchi chee ra ñquĩ si,

i ãte que Dios ángeles mo je ra. Jesús mii je que ñee ñquĩnda. ¹⁴ Dios ririĩ eã ño ángeles re. Dios rimba chõ ñene. Ae ra Dios mingo bei, ñquĩndaarõ sacuã ño ngue Dios ángeles mii nguiã.

2

Nandeichayã sacua Dios icha si

¹ Ae nandechandu quia Dios cheẽ nae, ũqui ndese nandeico ndua tuchi. I nda nandeichayã mbei Dios icha si. ² Ae rĩ ángeles riqui ñee mbia je cose nae, ñee ñooñoa tuchi chõ ñene. Ae ũqui ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiassa nande je cote ra. Nande echeẽ mumba mose ra mbae rasi nandesaã tuchi nande quiatu cote. ⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. — Jesucristo ñee ñooñoa ño nguia re, i sacua mbia que Dios Espiritu Turã mondo mbia je no nda. Ae je Dios Espiritu Turã mondo mondo sete nae, ũqui je chõ ngue Espiritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles. ⁶ Sã embesa ji ñi ñee ã no: ¿Mbaerã ereico nduate mbia rese re, Dios? ¿Mbaerã ereico eraarõ tuchi re? ⁷ Angeles que eremingo turã tuchi rei mbia si aque mose ra. Ũquinde ereico bei mbia mingo turã tuchi ángeles si co cote. Mbia que eremi mbae abe ja rerecuarã cote no nda. Ndechiao rerecuarã tuchi cote. ⁸ Mbae que eremi ja mbia mbaerã nda, i embesa ji huĩ ñee a. —Mbae rerecuarã ja ra mbia, i mose Dios, mbae ja rĩ ño ñee nguia. Mbae mbia

cheẽ mumbate raque quia ã. ⁹ Jesús m̃i ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia r̃i” i nguiã Jesús je. Emanonde que Dios em̃i mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacuã ño ũquĩ nde. Jesús mbae rasi raã mose, ererecua turã tuchi sacuã ño ũquĩ nde. ¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ ngũĩã nande je. ¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,
i que Jesús cheẽ mbesa ji huĩ nda.

¹³ Dios taicua tuchi,
i abe que Jesús cheẽ huĩ nda.

A aico seriirĩ Dios chimondo rese a,
i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacuã nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacuã. ¹⁵ Ae siquiche beite quia umano si nae, mbae icuã nimba raanguia chõ ũquĩ nde. Ũquĩ siquiche eã sacuã ño ngue Jesús mano nguiã. ¹⁶ Angel sacuã eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacuã. ¹⁷ Nyebe Jesús ru nguiã mbiarã nande rã. Ñee turã sacuã Dios je

nande riĩ. Dios nandembasi eã sacuaã nandeicuã nĩ. Jesús siqui mose mbiarã ngue mano mbia icuaã nĩ nda. Mbia icuaã mbutiã sacuaã esi. ¹⁸ Mbae icuaã ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icuaã tã i mose nande je.

3

Jesús quia rei i tuchi Moisés si

¹ Seresenda, Dios que jemiĩ icúe umbaerã tuchi ra. Nyebe aico nguiã ñee tuchi Jesucristo riĩ jėje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchua ao no. Tuchua aosa quia rei i tuchi tuchua uchiao si. ⁴ Mbia mo tuchua chao arondete raque. Dios miĩ nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ã nda Dios saã je mbia je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios riirĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyo: Dios récuua

⁷ Jesús quia i tuchi re. Nyebe Espíritu Turã ndiqui nguiã ñee nande je ã:
Dios cheẽ jeñandu rã namo.

⁸ Jeñia átãte ra jẽingochĩ jẽ.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ûquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui minguede quia ùquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguede nande je”, i rei que mbia jenamei nguia cose ra.

¹⁰ Nyebe Dios paama i nguia ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyo i serécuaa”, i tuchi que Dios erĩ nda,

i que Espiritu Turã ñee embesa ji huĩ nda. ¹² Cochee chõ jẽingo, Seresenda. Jẽicha eã sacua Dios reco si jeñiangui re. Dios jẽicua bei sacua jeñiangui re no.

¹³ —Nandeico i i tuchi quiatu quia Dios rese, jenyee jenyee bei quiatu quia jenyue. Jendeco mose íbii. † nda mbae icuã jembirĩ irĩ eã. † nda jẽteã teã eã Dios cheẽ je no. ¹⁴ Sã nande Cristo nandeicua raque nyii no, eĩ nande bei chõ nguia eicua i i. Ûquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheẽ jeñandu rã namo.

Jeñia átãte ra jẽingochĩ jẽ.

Sã cose ndare chiã átã mbeite riqui Dios cheẽ andu sereã turúquiaa eico mose no,

i que embesa ji ra. ¹⁶ ¿Aba chõ Dios cheẽ ñandu sereã eandure cose chã? Ae Moisés querao Egipto

si nae, ũquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icuã saã saã nae, ũquĩ ño ngue resẽ. Nyebe mano mano nguiã turúquiaa. ¹⁸ ¿Aba je chõ Dios ñee tuchi chã? — Jenguenea nda jẽucuayã mbei oso serécuaa, i chã. Ae echeẽ mumba quia nae, ũquĩ je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4

¹ —Ae seicua quia nae, ũquĩ nda nyoĩ serécuaa, i chõte Dios quia nande je co. Nyebe nandeico cochee. Cochee jẽingo eã mose, jemo jengasẽ eã arõte Dios récuua. ² Nande abe je chõ Dios riqui nguiã ñee co. —Ae seicua quia nae, ũquĩ nda nyoĩ serécuaa, i. Moisés reco mosenda achõ je eã ño ngue ñee nguiã. Ũquĩ ngue Dios chandu iru chooño nda. Dios icua rocoĩ. ³ Ae Dios icua quia nae, ũquĩ achõ ño nda nyoĩ ngasẽ Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serécuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ ã mbesa ji que chĩ nda:

Dios mbae ao jare que uqueneã ucua séptimo día ra,

i que embesa ji ra. ⁵ ã abe que chĩ embesa ji rese ra:

Uquenea nda eucua eã mbei nyoĩ serécuaa, i que embesa ji huĩ no nda. ⁶ Emo emo abe ra Dios icua. Siqui sacua erécuaa. Ae Dios

cheẽ ñandu nyii nae, ãquĩ ngue Dios icua eãte ra. Nyebe ngasẽ eãte nguiã Dios récuua. Dios cheẽ nguiatu ngue emumbate nguiã. ⁷Nyebe Dios riqui nguiã ñee nande je quiatu co. Nandeico sacua erese namo. Ûquĩ echeẽ mumbare nyii. Sã David Dios cheẽ mbesa no:

Dios cheẽ jeñandu rã namo.

Jeñia ãtãte ra jẽingochĩ, i que Dios ra, i que David embesa ra. ⁸Josué que mbia isrealitas mi aroneate Dios récuua ra. Uqueneã ucua sacua. ñnda Dios ñee ãte rei. —Taeming serécuua jengue-nea ucua sacua, i ãte rei. ⁹Nyebe ra Dios quiato nyoĩ ngasẽ Dios récuua. Huee ra uqueneã ucua tuchi huee cote. ¹⁰Ae ra ngasẽ Dios récuua nae, ãquĩ nda uqueneã ucua tuchi. Sã Dios uqueneã ucua tuchi mbae ao jare no.

¹¹Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, ãquĩ na nda nandecochoĩ nande mo namo jẽ. ¹²Dios cheẽ nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chiosei oseĩ abe mbuchecua tuchi aba je no. ¹³Mbae mo ndese Dios riqui jirandu eã eãte co. Mbae mo nandesaã nyecuayã cuayã aroneate quia esi ã.

Jesús ñee turã mbeĩ Dios je nande rã

¹⁴Jesús rei Dios riirĩ tuchi. Sacerdote rerecuua tuchi chõ eriqui nguiã nande je co. Oso que ibate Dios rea ñee ñee sacua nanderĩ nda. Eriqui ñee ñee

mbei Dios je nanderĩ co. Nyebe nandeico tuchi quiatu quia erese. ¹⁵ Diabło tã i mose nande je, Jesús riqui ico tochi tuchi nande je co. Ae rane je quiatu ngue diabło tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios rĩchã. Nyesecuate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirãcuã mee sacua nande je, diabło tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguiã mbia rĩ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icuã mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quirãcuã nea je. Mbia aquiatuã je abe. Mbia icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicuã mbutiã sacua esi. Mbia chisaã icuã abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote mĩ mĩ nda. Sã Aarón mĩ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emĩ nguiã. Sã Dios cheẽ mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no. ⁶ Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸ Dios ririĩte raque Cristo. Mbae rasi que esaã tuchi ra. Ñimbaaquiatu chõ ngue equia ãquĩ ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ãquĩ emingo bei quia co. ¹⁰ Dios quiatu ngue emiĩ nguia sacerdote rerecuarã. Melquisedec na si no.

Jeñimbaaquiatuã mbei chõchĩ equia Cristo rese ã

¹¹ —Mbae tasenei tuchi Jesucristo riĩ jėje, ae rei que se ra. Jẽ nguia secheẽ jeñandu sereãte nguia. Nyebe aico nguia embiasa asa aroneate jėje co. ¹² Cosete que jëingo rei Jesús icua resẽ. ¿Mbaerã jëingo ñimbaaquiatuã mbeite re? † nguia nda jëingo nguia emo mbaaquiatu quiatu chã. Jëaquiatuã mbei chõchĩ. Dios cheẽ aba chĩcua jëicuyã mbei chõchĩ. ãquẽ na ño jëingochĩ ã. Sã ãquẽ ndiqui usi quiandi achõ mbei no. Soo quiatu eu aroneate nguia. ¹³ ãquẽ na jëingo bei mose, jëaquiatuãte siqui mbae turã ndese. ¹⁴ Ae ñimbaaquiatu quiatu tuchi quia Cristo riĩ nae, ãquĩ nguia rei mbae turã icua tuchi, mbae icua icua rocoĩ. Mbia cuasu rã ño ãquĩ nde.

6

¹⁻² Ae rese jeñimbaaquiatu nyii nae, aba

chicuate ũquĩ. Ũquĩ miite rese jëingochĩ nguiã. Mbae aba chicuayã mo abe jëicua jiri Jesús rii ae. ã aba chicua que asenei ja jëje nyii ra: —Jenyisaã mbae icuã si jëhui, ae que jëje nyii ra. —Dios jëicua, ae que jëje nyii no nda. Bautismo abe que asenei jëje nyii ra. —Jëo jeñono Jesús quiato arõ, ae que jëje nyii no nda. —Mbia raque ra quera si, ae que jëje nyii ra. —Mbia Dios quiatoã nda mbae rasi saã tuchi tata cuásuu, ae que jëje nyii no nda. ³ Ũquĩ aba chicuate riqui ã ndesë. Aba chicuayã tasenei jëje cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chimee icua raque nyii. Espíritu Turã abe icua raque nyii no. ⁵ Dios cheë turã abe icua raque nyii. Dios quirãcuã abe icua raque nyii no. ⁶ Ũquĩ hui mose Dios si, uba si aroneate erese cote. Jesús mbucha si chõ nguiã ira rese ũquĩ. Iquia iquia chõ nguiã Jesús je mbia résaã ũquĩ. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheë mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Ñui achõ suri mose huee, eicuãte ũquĩ. Eĩ si chõ mbia Dios cheë andu choõnosa no nde. Eicuãte ũquĩ. Ũquĩ nda Dios mombo chõ tata cuásuu.

Dios ra ucheë mbuchebiã mbeĩ

⁹ Jenii aico nguiã ñee eã, Seresenda. Dios cheë jeñandu choõno eã nguia jë ndeae. Jesús jëicuate quia ũquĩ. Nyebe jëingo tuchi quia erese ũquĩ ndeae. ¹⁰ Dios turãte eriqui co. Tesareiã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ũquĩ. ¹¹ Eĩ jenye

bei quiatu equia nyesecua bei emo ndese. † nda Dios mbae mee tuchi je jêje. ¹² Jeñimbirâtã mbei chõ nguia mbae raã jê. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguia ee. Eriqui beite mbae mee mee ee co.

¹³⁻¹⁴ Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ñquĩ mose que Dios jurar i umbae nombre rĩ nda. ¹⁵ —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriirĩ mondo chee ee ucheẽ nguire cote ra. ¹⁶ Mbia jurar i mose, Dios rĩ ño eriqui nguia jurar i. —Ñquĩ nda asaã eã, i aroneate cote, jurar ire nyii. ¹⁷ —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jêje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguia nanderaarõ turãte nandeso mose eriichã. —Taemingo bei, i mose Dios nande je, ucheẽ nda embuchebiã. ¹⁹ —Dios ra semingo bei ibate ucheẽ nguire, nande equia ã. Nande ñquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios rĩchã sacua no. Eĩ nande chõ nguia nande abe Dios rĩchã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderĩ pe. Sã sacerdote riqui ñee turã mbei Dios

je mbia rĩĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jeme mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia

uataque si ã nae, mbiachõ ño ãquĩ nde. ãquĩ mano arondete. Melquisedec quiatu que mano eã mbeira. ⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. ãquĩ décimo isi isi raque nguesenda si. ¹⁰ Abraham ngue ãquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. † nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã. ¹² —Sacerdotes ra nyuuru uru eã ngõngue rendaque re cote, i que Dios aque mose cote ra. —Jesús mi nda siquĩ sacerdoterã mbei cote, i que Dios cote ra. ¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquĩã ndaque sacerdoterã cose. —ãquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús mi nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chimbesa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no:

Nde quiatu ereico bei nguiã sacerdoterã mbei co.
Melquisedec na si,

sã Dios i ñee ee no. ¹⁸—Sacerdotes ra nyuuru uru eã ngõngue rendaque re cote, i que Dios aque mose cote ra. Ñquĩ nguiatu ngue mbia mingo aroneate nguiã Dios rese. ¹⁹ Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹—Sacerdoterã nde, i mose emo je nyii, emo ngue jurar i ãte quia ra. Dios Jesús mi mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei. “Nde quiatu ereico bei nguiã sacerdoterã mbei co. Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ñquĩ contrato que mbia mingo eã Dios rese ra. Ae contrato Dios saã Jesús rĩ namo nae, ñquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote. ²⁵ Ae ra Dios siichã Jesús rĩ nae, ñquĩ nda Jesús mingo bei tuchi. Jesús quia siqui beite nguiã co, ñee turã sacua Dios je ñquĩ ni.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia ibatenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. Ñquĩ nguiatu ticuasú quishĩ

quishĩ mbeite nguiã sacrificio raã naa. Dios eicuã mbutiã sacuaã esi. Mbia abe icuã mbutiã sacuaã esi. Jesús quiatu ngue ticuasu mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacuaã. Mbia icuã mbutiã ja sacuaã ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. Ñquĩ ngue mbae turã saã mbei aroneate quia ra. Dios quiatu que Jesús mi sacerdote rã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩ

¹ Ababi tuchi quia rei Jesús siqui mose sacerdote rã. Sacerdote turã tuchi quia rei ae nande je. Hue eñi ngoi Dios Ibatenda ribisho quiti nande je huee. ² Hue eriqui mbae raã naa Dio s chuchua ibatenda huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacuaã nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ñquĩ nguia eturã tuchi sacerdote chisaã si re. Cristo siqui mose íbii, eĩ nda sacerdote eãte rei ae. Moisés chimbesa cheẽ ndui achõ ño sacerdotes ibi jenda riqui nguiã sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacuaã ño ñene. Sã Dios ñee Moisés je Dios chuchua ao nonde no. — Ndeico mose ibi ibátee que sechuchua ibei jenda atecuquia ndeje, ñquĩ na si chõ sechucharã ibi

jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiataũte que ũquĩ nda. Ae contrato Dios saã nande je namo Jesús rĩĩ nae, eturã tuchi chõ ũquĩ cote re. —Ã tasaã jẽje. ã abe tasaã jẽje no, i tuchi Dios quia contrato namonda rĩĩ nande je co. ⁷ Contrato ñiinda mbia mingo bei mose Dios rese, ã nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui no:

Ã ño ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ũquĩ namei je nyii nae, ũquĩ contrato rã eã nda eyasu asaã cote.

Mbia arao quia Egipto si nae, ũquĩ mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ.

Contrato raande que secheẽ mumba mumba chõ nda.

Nyebe ũquĩ asecha chõ nguiã, i que Dios ra.

¹⁰ Ae contrato ra asaã je Israel jenda je, ã ndei e ã:

Secheẽ nda amii tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ũquĩ.

¹¹ Seicua ja tuchi rae. Mbia cuasu ja.

Eñetẽ abe ja chee.

Seicua ja mose, ũquĩ mose emo uataque mbaaquiata quiatu aroneate serĩĩ cote.

Seicua ja tuchi quiatu ra aque mose.

¹² Ũquĩ icuã nda ambutiã ja esi.

Atesarei bei ra eicuã si,
 i que Dios cheẽ huĩ embesa ji rese ra. ¹³—Contrato
 yasu tasaã, i que Dios cote ra. Contrato ñiinda
 imate quiatu ngue ee re. Mbae ima nda ua ja cote.

9

*Cristo rei sacerdote tuchi cote; sacerdotes ñiinda
 rã eã*

¹—Eĩ jenye jenye bei chõ nguia mbae raã naa
 mose sechuchuaa, i que Dios sacerdote je ra. Con-
 trato ñiinda raã mose. Uchuchua ibi jenda riĩ
 ño eriqui nguia ñee, “sechuchua” i mose. ² Dios
 chuchua que cuartos nyeremo ñi nda. Eiquesa
 jii que cuarto nongue ñi nda. Lugar Santo, i que
 hue cuarto je ra. Candelero oro ao ji que chĩ huee
 ra. Mesa abe que chĩ huee ra. Mbichae Dios
 chuchua jenda abe que chi huee no nda. ³ Cortina
 mbucheseco ji que siqui tuchia ite rĩ nda. Aque
 quitera quti que cuarto nongue ñi nda. Lugar
 Santísimo, i que hue cuarto je ra. ⁴ Huee que altar
 mo ñi oro ao ji ra. Mbae shĩmbu turã ndei sacua.
 Ira ao ji mbae riru mo abe que chĩ huee ra. Oro
 quti ji resebe que ra. Contrato Dios cheẽ mbesa
 ji que chĩ aque mbae riru imi ye ra. Oro ao ji ñio
 abe que chĩ mbae riru imi ye ra. Mbichae resebe
 que eñi nda. Maná i equia ee. Aarón chitochoquia
 ruri abe que chĩ mbae riru imi ye no nda. ⁵ Angeles
 raanguia ao ji que chi ibate mbae riru arõ nda.
 Querubines, i que ñquĩ je ra. Ujeo que embiitee u
 mbae riru arõ nda. Sacrificio renda rei mbae riru.
 Ñquĩ cuartos nyeremo jenda asenei ja aroneate jẽje
 namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua mii ño ngue i que quia huee ra. Ique chibe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huique mose huee ra. Dios eicuaã mbutiã sacuaã. Mbia icuaã abe mbutiã sacuaã. ⁸ Aque mose bei que mbia mo ndiqui ique aroneate Lugar Santísimo nda. Dios ríchã tuchi sacuaã. Uqui ndese Espiritu Turã ndiqui urembiirandute ã. ⁹ Sacerdotes que ticuasú iquia iquia tuchi rei quia aque mose ra. Uqui ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue uqui nda. Uqui nandecuate quia ã cote. ¹⁰ Contrato ñiinda que mbia mingo turã aroneate quia ra. Mbae rí achõ ño ngue eriqui nguiã ñee. Mbaeia rí. Mbia chi rí. Mbia chimbei rí. Mbia choita rí. Uqui ñi ja. Uqui ñee ndui sí chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mii ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹² Cristo quiatu ngue ticuasú ruqui sii sii eã u nguiã nande je. Chivo ruqui abe. Nguqui ae je chõ ngue nandecuaã mbutiã nguiã. Mano mii ngue mbia ja je ra. Mbia mingo bei sacuaã cote. ¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riirí ndaque rei ji

cusubu abe no. ¹⁴ Cristo ruqui quia rei equirãcuã tuchi ùquĩ mbae ruqui si. Cristo ruqui miñ nguia rei nandendua nduasa mbitirõ tuchi. Ae ruqui miñ nguia rei nandemingo turã Dios reco rese. —Se ae tamano mbia icuã mbitirõ sacuã. Mbia mbae turã naa naa sacuã Dios je cote, i que Cristo mano nda. Mbae icuã mo ngue esaã jiri jiriã tuchi ra. Espiritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo eriichã tuchi sacuã cote. Dios chiirabo siqui tuchi sacuã erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ùquĩ icuã niñ ngue Cristo mano nda. ¹⁶ Ae contrato Cristo saã nande je nae, testamento chõ ùquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷ Testamento raãsa manoa mose, testamento chõoño ño aque mose re. ¹⁸ Dios contrato ñiinda raã namo mose que ticuasú iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacuã jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua

teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icuã mbutiã esi. Dios que mbia icuã mbutiã choõño eã nda. Mbae quishĩ mose bei quiatu ngue eriqui nguiã mbia icuã mbutiã mbei esi.

Cristo m̃i aba icuã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitorõ sacua nda. Ibatenda quiatu que embitorõ eã mbae ruqui je ra. Cristo ruqui m̃i je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano m̃i nda. Nguqui que eichusẽ tuchi nande je ra. ²⁶ Cristo que tu m̃i ibi ra. Mano m̃i sacua nande je. Nande icuã mbutiã sacua. Mbae ua serĩ mose que eru mano aa ra. Mano nyĩbei ibei eã equia co. ²⁷ Sã mbia riqui mano m̃i no. Sã Dios riqui ecuata mee aquere no. ²⁸ Eĩ si que Cristo mano aque m̃i no nda. Mbiam icuã ja mbutiã sacua esi. Cristo ra tu si ibii emo mose. Aque mose ra manoa mbiam icuã ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ñquĩ mingo bei sacua.

10

¹ Moisés chimbesa que mbiam mingo turã eã

ndaque ra. Mbia mundua ndua sacua Dios riiri
 mano ndese cho ngue re. Ticuasu mbia quishi
 nyibeibe rei quia nae, uqui nduqui que mbia
 mingo turã eã no nda. ² Uqui mbia chia mbitiro
 mbeibe mose, eã nda sacerdotes equishi nyibeibe
 ate rei. Eã nda ticuasu mbi quishi ndei mbia mbitiro
 ja sacua. Eã nda mbia tesareibe huicua si. ³ Mbia
 ticuasu quishi nyibeibe mose, uqui ngue em-
 butesareiate huicua si ra. Munduate quiatu que
 huicua ndese ra. ⁴ Ticuasu ruqui ra mbia icua
 mbutia eã mbeibe. Chivo ruqui abe no.

⁵ Cristo ruqui mbi quiatu mbia icua mbutia
 nguia esi co. Sa Cristo ñee Dios je siqui mose ibi
 no:
 Ticuasu ruqui mbia mbitiro eã mbeibe quia ndeje
 co.

Nyebe que serete ereme seje ra.

Se mano sacua mbia icua mbi.

⁶ Mbae raaque rei ji abe ndeiate.

Ticuasu mbia quishi quishi nguia huicua mbi nae,
 uqui abe ndeiate no.

⁷ Nyebe ngue acheẽ nguia ndeje: “Ae ndebite nae,
 uqui ndese seico sacua ño ngue achu nguia.

Sã embesa ji riqui ñee serẽ no, uqui ñee nguire que
 achu ra”, ae que ndeje ra,

i que Cristo ngu je ra. ⁸ Nyebe Dios biaete riqui
 nguia sacrificios. Mbia ticuasu quishi quishi mose
 huicua mbi. Mbae raaque rei ji abe eiate no. —

Uqui jesaã saã, i raque Moisés chimbesa hu. ⁹ —
 Ae ndebite nae, uqui ndese seico sacua ño ngue
 achu nguia, sa Cristo i Dios je no. Mbia mbui
 sacua sacrificios raã naa si cho ngue eru nguia.

Sacrificio m̄i tuchi que esaã u mano mbia icuã n̄i nda. Cristo ruqui m̄i ño mbia icuã mbitirõ mbei nguiã co cote. Sacrificio raã i i rocoĩ. ¹⁰ Ae Dios bite nae, ũquĩ ngue Jesucristo saã tuchi u ra. Mano mose mbia ja icuã n̄i. Mano m̄i tuchi que u ra. Nanderirõ mbei que nandeicuã si cote ra. ¹¹ Sacerdotes riqui beite raque Dios chuchua ã. Ticuas equishĩ nȳibeĩ ibeite raque quia mbia icuã mbutiã sacuaã ã. Ũquĩ nda mbia icuã mbutiã eã mbei. ¹² Jesucristo quiatu que mano m̄i aque mose bei ra. Mbia icuã ndiquicharõ sacuaã ño ngue re. Aquere eñi ngoi bei Dios ribisho quiti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote. ¹⁴ Sacrificio m̄i ngue esaã nda. Aque m̄i sacrificio je que uquiato chiã mbitirõ ja bei ra. ¹⁵ Sã Espiritu Turã abe riqui ñee ũquĩ no:

¹⁶ Ae contrato ra asaã je judíos je nae, ã ndei e ã: Secheẽ nda am̄i tuchi echiangui re. Secheẽ nda am̄i tuchi eãquĩ ndese no.

¹⁷ Atesarei bei ra eicuã si, i que Espiritu Turã nda. ¹⁸ Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui rĩ nandequi Diósaa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe

nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo mii ndei sacerdote tuchi nande je cote. Dios quiato ja je cote. ²² Diósaa ra nandesiquicheã ique oso cote. Nandechiã turã ño nandeico oso Dios riichã. —Dios ra nandehi turã, nande chõ nguia nandechiangui re. Cristo quiatu ngue nanderii rii nguia nguqui je nyii. Nandecuã mbutiã sacua nande si. I turã je que nandehi ra. ²³ — Taemingo bei, i que Dios nande je ra. Ñeende ãquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i. ²⁴ Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesequa turã nguiatu quia nyiese. Mbae turã nandesaã uquia bei quiatu quia nandenongue je. ²⁵ Cristo quiato ñumunua nua mose, nandetesareia mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nandere-senda je. Achite quiatu Cristo ñi nguia tu a.

²⁶ —Mbae icua tasaã, nande i i mose Jesucristo icuare, emo nda manoa nandecuã ndiquicharõ cote. ²⁷ ãquĩ mose, mbae icua nda nandesaã tuchi. ãquĩ mose, nandeso chee ra tata cuásuu no. Huee ra Dios ucuãyãsa nyo ja. ²⁸ Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etiisu isu eã tuchi eiquia ra. ²⁹ Dios riirĩ ucuãyãsa quia ra mbae rasi saã tuchi ãquĩ si. Cristo ruqui ucuãyãsa abe no. Ae Espiritu Turã isiteã teãte quia

nae, ũquĩ abe no. Cristo ruqui je quiatu ngue Dios ũquĩ m̃i ndei nguiã icúe. ³⁰ Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda. ³¹ Ae ra Dios mbasi eicuã ñi nae, mbasi tochi eã ndae. Aba mbusiquiche tuchi chõ ũquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã mingue que equia aque mose ra. Ũquĩ ndese jendua jiri ae. ³³ Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴ Jẽya eãte que eriqui mbia tarõ ji rese ra. Mbia jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵ Dios jẽicua bei quiatu quia aque mosenda rã mbei. Ũquĩ mose ra Dios mbae turã tuchi mee jẽje. ³⁶ Ae Dios bite nae, ũquĩ ndese bei chõ jẽingo. Ae mbae turã nda Dios mee jẽje nae, ũquĩ jẽsaarõ arõ mingue chõ nguia cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra huĩ Dios si nae, Dios ia eã tuchi ra erese. ³⁹ Nande quia ra nandehui eã mbei esi. Ae ra huĩ esi nae, ũquĩ nda Dios mbutiã. Nande quiatu Dios nandeicua tuchite nguiã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ãquĩ ña? Ae Dios icua nae, ãquĩ nda ñee. —Ucheẽ nguire ra Dios mbae mondo seje, i rae. —Ae asaarõ arõ nguia nae, ãquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbia riqui nguiã jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nande icuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguiã. —Co eturãte riqui seje co, nyebe Dios i nguiã Abel ñi. Nyebe mbia riqui nguiã jirandu jate Abel rese. ⁵ Enoc que Dios icua ra. Nyebe Dios ererao nguiã ibate emano mose rocoĩ. Mbuaate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñi nyii reaẽ. ⁶ Emo Dios icua eã mose, ãquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios rĩchã mose, Dios turãte ra ee, sã i quiatu no. Aquere quiatu ra Dios eisi turã cote. ⁷ Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguiĩrĩ mingue sacua eye. Mbua ataque

que Dios icua eãte quia ra. Noé m̃i ño ngue eicua quia ra. Nyebe Dios Noé isi turã nguiã.

⁸ Abraham ngue Dios icua ra. Nyebe Dios cheẽ mumbayã nguiã. Dios que ñee ee ra. —Eso rã a si. Ibi mo tamee ndeje mámbi, i que Dios ee ra. Abraham ngue Dios cheẽ mumbayã oso ra. Ae quti esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguirĩ ndese. Isaac. Jacob abe no. Ñquĩ je abe que Dios ñee nda. —A ibi tamondo jẽ abe je, i. ¹⁰ Abraham quiatu que Dios icua tuchi quia ra. Nyebe ñee nguiã. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguirĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quishĩ tubiriãte riqui no.

¹³ Ñquĩ ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ñquĩ ndurubi quíã ño ngue mano nda. —Dios ra emondo ure je uremanonde, i que eyate quia ndua ndua ñquĩ ndese ra. Ñquĩ nguiatu que Dios icuate quia ra. —Nandeico mbiri ndaque equia ibii ã. Ibatenda chõ nande re, ite que equia eicua ra. ¹⁴ Emo ñee mose ñquĩ, siqui sete quiatu nguiã

Dios récuua. ¹⁵ Ũquí ndua ndua mose nguecua rese nda nyoi si nyebi re chã ae. ¹⁶ —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ũquí ndecua turana quereco co.

¹⁷ —Ma Abraham secheẽ mumbayã, i que Dios Abraham nñi nda. —Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mñi nñi. ¹⁸ —Isaac nda tiirĩ tuchi ndeje, i rei que Dios ee nyii ra. ¹⁹ Abraham ngue Dios icua tuchi te quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde. ²⁰ Isaac que Dios icua ra. Nyebe ñee nguiã nguiirĩ je. —Dios ra mbae turã saã jẽje, i que Jacob je ra. Esaú abe je. ²¹ Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jẽje, i que ee ra. Uchitochoquia rese que nyeco rei nyibi ñee turã Dios je ra. ²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴ Moisé s abe que Dios icua quia

aquere cote ra. Nyebe “Egipto jenda rerecua riirĩ nducucha eã se” i nguiã. ²⁵ “Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icuã ndese aba oote raque. Aba mbia mbirĩ ño ñene. ²⁶ —Taico chõ Dios rimba rese. Mbia ra sembasi mbasi raque Cristo rĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Nĩmbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jẽiquesa ja jẽsii sii. I nda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ãquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba rĩĩ abe ra aba ñee jēje re? Dios quiato tubiriãte quiatu ñene. Ũquĩ asenei ja aroneate jēje. Gedeón. Barac. Sansón. Jefté. David. Samuel. Dios cheẽ mbuchecuasa ja rĩĩ. ³³ Ũquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que eteaquiato quiatu bei quia nyacua mbaba mose abe ee ra. ³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que eteaquiato quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua. ³⁵ Cuña abe que Dios icuate quia ra. Nyebe Dios eriirĩ ndaque mbuquera si nguiã ee. Emo emo abe que mbae rasi saãte quia Jesús rĩĩ nda. Hui sereãte quiatu que equia esi ra. —Sã sei quia rei. Dios ra sembuquera si nguiã. Serete mbuchiicua bo turã ndae, i que equia ra. ³⁶ Emo emo ngue ñĩmbirãcuã nguia mbia iquia iquia chooño mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei equia iquia ra. Emo emo ngue echisiamo tuchi ra. Mbae rasi je que eriqui ñĩmbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra.

38 Ûquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

39 Ûquĩ ngue Dios icua tuchite rei quia ra. — Mbae turã tamondo jẽje, i rei Dios quia ee nyii nae, mee jei eã ngue ee ra. Mee je quia ra ee cote. 40 Ûquĩ mĩ je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ùquĩ ndese.

12

Jesús mĩ ndese nandendua ndua

1 Sã Dios icuasa tubiriãte cose no. Ûquĩ na ño nandeico nande abe Dios icua tuchi. Ae nandembuti mbuti quia Dios si nae, ùquĩ si nandehui. Ae mbae icuã aba mbuchĩshĩ arõte quia nae, ùquĩ si nandechĩcuasẽ ño. Jesús mĩ ndui chõ nandeico ngata. Nandechimbirãcuã ño nguia siqui erese. 2 Jesús mĩ ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

3 Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondocho eã ngue ra. 4 Jesús mĩ ngue mano mbae icuã ndiquisã quisã sacuã mbia si ra. Jẽingo mose mbae icuã ndiquisã quisã,

aba mo ngue jêiquia eãte jê nguiatu ra. ⁵ ¿Embesa ji si jêtesarei chõ nde? —Seriirite quia jê nde, ite Dios quia jêje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã ñi, ereisiteã teãchĩ nda jê.

Dios ñee mose ndeje ndeicuã ñi, echeẽ eisi turã ño.

⁶ Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguiirina nae, ãquĩ je ra ñee eicuã ñi, i que embesa ji huĩ ñee nda. ⁷ Dios “seriirĩ” i tuchi quia jêje co. Nyebe eriqui nguiã mbae rasi raanguquia jêje jêicuã mose co. Sã mbia ja riqui nguiirĩ iruã eicuã mose no. ⁸ Dios mbae rasi raanguquia eã mose jêje, eriiriã nguiatu rei jê. ⁹ Sã nanderu ibi jenda riqui nandeuruã nua nandẽnetẽ mose no. Nandembaaquiату sacuã. Sã nandeco echeẽ mumbayã cote no. Eĩ nande sí chõ Paba ibatenda je. Ae cheẽ nguiatu nandemumbayã tuchi. ãquĩ mose ra nandereco siqui turã tuchi.

¹⁰ Sã nanderu ibi jenda riqui nandembaaquiату jua raque no. Nandeco turã sacuã aa íbii. Dios quiату nandembaaquiату turã tuchi nguiã nanderu ibi jenda si co. Nandechiã mbitirõ sacuã ae rã si. ¹¹ Dios mbae rasi saanguquia mose nande je, nandehosei chiãte raque. Erasite quia ñene. Aquere quiату ra nandechimbitirõ cote. Aque mose quiату ra nandeya cote.

Dios cheẽ nda jêisiteã teãchĩ jê

¹² Jêo tomei jembirãtã jiri ae. Jêtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae. ¹³ Jêingo tuchi quiату quia erese. Ae ndua ata atate quia

nae, ï nda ùquĩ abe siqui tuchi chee erese chã. ¹⁴ Jẽingo turã mbia ja rese. Dios rã si chõ jẽingo. Dios rã si nandeicoã mose, nandemae eã mbei ra erese. ¹⁵ Jenyiteaquiatu turã ño nguia. † nda jemo Dios turã isiteã eã. Emo mbae icuã naa mose jẽje, jẽtesarei chõ esi. Jendua icuã icuãchĩ nda jenongue riĩ jẽ. Ùquĩ mose ra jeñimbũcuã jate. ¹⁶ Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jẽisiteã teãchĩ jẽ. Sã Esaú no. Aque que umbae herencia mondo ja chõ soo ñetẽ ndibishorõ nda. ¹⁷ Aquere que “sembae herencia taisibe” ï rei nyeseo tuchi ra. “Bendecir ere rã seje”, ï rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguia cote.

¹⁸ Dios turã tuchi riqui jẽje namo co. Mbia Moisés mosenda je si. Aque mose que mbia riqui titi titi ï tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã ï tuchi quia ee aque mose ra. ¹⁹ Trompeta que nyuihui ee no nda. Dios que ñee ee cote ra. Mbia que Dios cheẽ ñandu sereãte ra. ²⁰ Dios quiatu ngue ñee nguia nyii: —Emo oco mose sita ibate rese, ùquĩ jẽiquia. Mbae quiaa rĩnda abe oco mose erese, ùquĩ abe jẽiquia no. Sita je jẽiquia. Jeñio no ae, ï quiatu que Dios ee nyii ra. ²¹ Aba mbusiquiche tuchi que mae mose ùquĩ ndese ra. —Aico titi titi ï tuchi esi co, ï chee que Moisés abe ra. ²² Eĩ jenye eã ño jẽ nde. Dios jembusiquiche ãte quia jẽ co. Dios recua jẽsichã tuchi quia jẽ ã. Dios reco chuchua. Jerusalén naanguia ibatenda jẽsichã tuchi quia jẽ

ã. Angeles tubiriã abe jēsichã tuchi quia ã no. ²³ Dios icuasa ñiinda abe jēsichã nguia ã no. Ũquĩ mbae nombres mbesa ji chi ibate pe. Dios abe jēsichã nguia ã no. Ae ra Jesús quiatoã icuã tea tea ja emo mose. Mbasi ja rae. Jesús quiato mano je abe chõ jēsichã ichã nguia ã no. Ũquĩ ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jēsichãte quia ã no. Ae ruqui riĩ ngue Dios contrato yasu raã nande je ra. Ae ruqui rii rii ji jēsichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jėje co. Echeẽ nda jēsiteã teãchĩ jē. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande je co. Ae cheẽ nandechandu sereã mose, mbae rasi ra esaanguquia tuchi nande je cote. ²⁶ Dios cheẽ mose que ibi nyere nyere aque mose coose ra. —Namo nda ibi ambuchere si no. Ibi miĩ ño eã nda ambuchere. Ibei abe ra ambuchere no. Aque miĩ nda ambuchere cote, i Dios quia co. ²⁷ —Aque miĩ nda mbae ambuchere ja, i Dios quia co. Aque mose ra mbae ua ja Dios chiaõ. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ũquĩ mose ra eya tuchi nanderese. ²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyeseua jenyiese

¹ Jenyesequa quia jenyiese jẽ. Nyiesenda chõ jẽ nde. ² Mbia ngaẽ mose jenyuchúaa, jëisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguiã ee. ³ Etarõ ji rese jëingo ndua. Mbae turã jësaã saã ño nguia ee. Jëtarõ ji raanguia chõ jẽ abe erese re. Ae je mbia icuã icuã ndiqui nae, ùquĩ je jëingo turã ño. Sã jẽ abe jendete riqui no. Sã jẽ abe jëiruã nua arõte no. ⁴ Emo siqui mose ngũinisi rese, ùquĩ Dios bite. Sã emo ngũinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ùquĩ je. Ae ninisi ãte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jẽ. Jembae mi ndese chõ jëya. —Jaendechayã mbei ra se, i quiatu Dios nguiã co. ⁶ Ae bei jẽ. Dios ra nanderechayã mbei. Nyebe nandeico nguiã ñee: Dios riqui beite serese co. Mbia mo si ra asiquicheã, nyebe nandeico nguiã i ã.

⁷ Jenderequa rese jëingo ndua. Ùquĩ ño ngue Dios cheẽ senei senei jëje ra. Ùquĩ ndiqui Dios icuate ùquĩ. Eĩ jenyẽ Dios icua jẽ abe ùquĩ na si. Ùquĩ nguia siqui turãte nguiã Dios rese ùquĩ. ⁸ Eĩ mbei chõ Jesucristo re. Cose mosenda bei. Namõ abe chee. Eĩ mbei ra ae quia. ⁹ Mbia jembaaquiato ata ata mose, echeẽ si jëhui chõ. Mbia jembaaquiato choõno mose, echeẽ si jëhui chõ no. Ae je mbia riqui mbaeia i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguiã.

10 Jesús m̄i ngue mano nande je ra. Sacrificio rei ae m̄i nande je. Cose ndare rã eã namo cote re. Ticuasú ra mano eã nandeicuã mbutiã sacua cote. Jesús ruqui m̄i ño nandeicuã mbutiã nguiã co cote. 11 Sacerdote rerecua riqui ticuasú ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque. 12 Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. 13 Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. 14 Nanderecua ibi jenda ra ua chõ. Dios ra nanderecuarã mee nande je ibate. Uqui ngua ra ua eã mbei. 15 Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei erĩ. 16 Jẽingo turã ño ngua mbia je. Jembae jemee mee ngua emo je. Uqui Dios bite.

17 Jẽingo turã jenderecua je. Echeẽ jemumbayã. Jenderecua riqui jendeaquiato quiato Dios je uqui. —¿Jeteaquiato turãte equia re? i chee ra Dios ee. Jenderecua cheẽ jemumbayã mose, eyate ra uqui mose. Echeẽ jemumba mose, eya eãte ra jendese. Jẽ abe ra jeya eãte no.

18 Jeñee mbei quia Dios je urerĩ. Ureico turã sete equia mbia ja je ã. Ureico ndua icuã icuã eãte emo n̄i ã no. 19 Jeñee tuchi quiato quia serĩ Dios je. 1 nda Dios semondo jei jendea.

Echeẽ hui bei

20 Dios ae aba mombia nguiã. Dios ae que Jesús raaque mbuquera si ra. Jesús ruqui rĩ ngue Dios

ucheẽ yasu mee nande je ra. Jesús ruqui rĩĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹ Sã Dios riqui jembuquirãcuã tuchi. Ʀnda jẽingo bei ae Dios bite ãquĩ ndese. Sã ae riqui tuchi nandechiangui re. Nandemingo tuchi sacuã ae ebite ãquĩ ndese. Jesucristo quiatote quiatu nande re. Sã mbia ñee turã mbei quiatu quia erĩĩ. Amén.

²² Seresenda, aico co mbesa juate jembiirandu sacuã a. Secheẽ jemiĩ tuchi rã jẽaquĩ ndese. ²³ Aico jembiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴ Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque. ²⁵ Sã Dios siqui turã jẽ ja je. Amén.

Mbia Cheë
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
eb2687f2-4654-5d43-8ec2-3ee35e8a435e